



GMN TV 06 May 2019

PPN Arão Noe: TL-Australia konkorda sei ratifika FM iha data hanesan



Prezidenti Parlamentu Nasionál (PPN), Arão Noe Amaral, informa, Parlamentu Nasionál (PN) Timor-Leste ho PN Australia, sei fiksa data ne'ebé hanesan hodi ratifika Fronteira Marítima (FM), atu nune'e rezultadu husi ratifikasaun ne'e tama iha vigór.

"Ita kompriende, Australia agora dadaun iha faze eleisaun jerál, hein katak, sira konklui tiha sira-nia eleisaun ne'e, hein katak prosesu ratifikasaun ne'e bele la'o, tanba lei hateten katak, so parte rua ne'e ratifika hotu, entaun Timor-Leste mak ratifika de'it, sem Australia mós nia labele tama iha vigor, Tanba ne'e, ratifikasaun ne'e tenki iha parte rua hotu, dala ida de'it, tanba ne'e mak uluk ami soe ona ideia ida, atu halo ratifikasaun iha data hanesan, ita presiza iha enkontru ida ho Governu, para ita fiksa data ne'ebé hanesan, nune'e haruka ba Prezidente promulga no publika ona ne'e, tama iha vigor, entaun parte rua bele implementa akordu ne'e", informa Arão Noe Amaral ba jornalista iha PN, Sesta(03/05 /2019).

PPN ne'e haktuir, agora dadaun aproveita tempu hodi hein Australia hala'o prosesu eleisaun, Timor-Leste mós prepara hela lei balun, nune'e bainhira FM ne'e tama iha vigor sei la komplikadu tan.

"Governu sei prepara hela baze legal balun, ho dekretu lei balun, depois alterasaun ba lei tributaria, tanba kuandu ratifika ona, direitu tomak iha kampu bayu undang ne'e ita nian, entaun atividades hotu iha bayu undang nian ne'e, hodi ba mai ne'e, kompetensia lei tributaria nian. Tanba ne'e, ita tenki aserta kedas ita-nia lejislasaun sira, para nune'e, kuandu to'o ratifika, lei sira ne'e vigora kedas, no aplika kedas, para labele husik kompañia sira hela ho dúvidas, tanba ne'e mak presiza lejislasaun sira ne'e, antes ratifika", afirma Arão Noe Amaral.

Iha fatin hanesan, Ministru Negósiu Estranjeirus no Kooperasaun, Dionísio Babo hatete, Timor-Leste prontu ona atu halo ratifikasaun ba FM, maibé sei hein hela Governu foun Australia nian, tanba Governu atual jestaun hela, nune'e iha governasuan foun foin fiksa data hodi ratifika.

"Ida ne'e MNEK sei koordena hela ho gabinete fronteira marítima, no gabinete prezidénsia konsellu ministru, maibé ita laiha problema, ita agora hein de'it Australia, tanba Australia agora foin atu tama eleisaun, tanba ne'e, hein fali Governu foun Australia nian mai mak ita fiksa data ne'e, para depois asina iha lora ida de'it, Parlamentu rua ne'e asina hamutuk de'it, tanba sira-nia Governu ida agora ne'e, Governu jestaun de'it ona", katak Dionísio Babo ba jornalista iha PN.

Akordu delimitasaun fronteira marítima ne'e, asinadu husi representante Governu Timor-Leste, Agio Pereira, no representante Governu Australia Ministra Negoiu Estranjeirus, Julie Bishop iha Nova lorke, iha lora 6 fulan Marsu tinan 2018.**say**